

LWĪTIKO



Loli ugwe kufimbilisigwa ukubombela ulwitiko mwa Kyala, ukukipela ikyene ukubomba. Muketile? Polelo ugwe uli nu busyuke bwako gwimwene nkati mwa ugwe. Ubusyūke bwīnu bulambalele nkati mwa umwe, mwa mbepo gwāko.

² Lilino, umwe mumenye, akabalilo kako Yeso āfwile pa kipingika, “Umoyo Gwake gulinkusulukila ku gehena nukulumbilila ku myoyo igi gyaali mmnyololo, igi gikāpīndwike mma mu masiku gabufindang’oma ga Noa.” Umbili Gwāke gwābūkile mu lipūmba. Lōli, bo Umwēne akāli ukufwa, Umwēne ābīkile u Mbepo Gwāke mmaboko ga Kyala. Nkati nkiboko... “Nkati nkiboko Kyāko une ngutwāla u Mbepo Gwāngu.” Polelo, umwe muketile, u Mbepo Gwake alinkubuka kwa Kyala; u moyo Gwake gwābukaga ku gehena; u mbili Gwake gwābukile ku lipumba.

³ Lilino, u Mbepo yula uyu aali mwa Umwene aali yo Mbepo gwa Kyala. “U Mbepo yula, ntubalilo utwaiyolo kangī mu njila ingindanekindane, abasololi abapakigwe, ukutwala i Ndumi ku bandu; mmasiku ga bumalikiyo, ukwisila mwa Kristi; kangī lilino, mmasiku aga apa, ukwisila mu Nongwainunu.” Lilino, akabalilo kako uswe tukwambilila Kristi mu ndumbula syitu, filipo fyosa ifi uswe tukulondigwa. Bulipo u Bumi bwa Syepwa.

⁴ Lilino, Kristi akābagīle ukugomokela mpaka amasiku matatu gāsismikisigwe. Panongwa yakuti, Mbepo Gwāke āli kunyuma ku kikīngo, ngati ikitapwa, bo *ulu*, ukuti Umwēne akābagīle ukukilania ikitapwa kila, panongwa yakuti ilyēne lyāyobīgwe i Lisyu lya Kyala, ukuti, “Umwēne āfimbilisigwāga ukulāmbalāla mu lipūmba ku masiku matatu ni kilo itatu.” Lilino, Umwēne akābagīle ukugomokela mpaka amasiku matatu gala ni kilo itatu fyāmālike. Polelo akabalilo kāko amasiku matatu gāmālike, Mbepo Gwāke alinkwābuligwa. Ikyene kilinkubuka kulakula ku moyo Gwake, kangī u moyo Gwake gulinkwisa ukugomokela nukupimba u mbili, kangī gwāfwanikiseye ifi Umwene āyobile, “Une ndi na maka ukulambalika ubumi Bwangu pasi. Une ndinago a maka ukugwega ugwene kangī. Une ndi na maka.”

⁵ Lilino, aligwesa gwa umwe muli na maka, injila yilayila, panongwa yakuti umwe mwe banabalumiana na banabalindwana ba Kyala. Kangī u Mbepo yulayula uyu ali mwa ugwe, ulubunju ulu, u Mbepo Mwikemo uyu ali mwa ugwe ulubunju ulu, yula yulayula Mbepo Mwikēmo isakukufyūsyā ugwe mmwanya. Popāpo, ugwe uli na maka ukukufyūsyā gwīmwenē kangī mmwanya.

⁶ Akabalilo kako ugwe kufwa, u moyo gwako gukubukaga nkati mu—mu... pási pa kigemo kya Kyala, komma mu... mulamula mu Kuyapo kwa Kyala. Lilino, u mbepo gwako ikubuka kwa Kyala, loli ugwe ukabagila ukugomokela. Kumbukilaga, mwi Bangeli, Ilyene lyátile u mbepo... “Imyoyo pási pa kigemo, gikukúta, ‘Ntwa, ko kabalilo katali kaki, ko katali bulebule?’” Kangi abène bakābagile ukugomokela mpaka a Masimbo gikufwanikisania, kangi, bo yu Kristi, akābagile ukugomokela mpaka a Masimbo gikufwanikisigwa. Polelo, ukufuma pa i, fyōsa fila fyābōmbìgwe, kōsa ukukubilwa kumalike, kangi a bakūndwe bakubīlwe ifīndu filafila pamo uswe tukubīlwe mūmo abène balinkukubilwa, na fyosa bo ifyo; polelo, pisiku lila, ugwe kwisakumanya katikati kūko ugwe kusyiligwa, mbepo gwako isakwābuligwaga ukufuma kwa Kyala kangi ikwisaga ku moyo.

⁷ Lilino, u moyo go kiyabo kila ikya umwe mwe mumenye kangi mukupilikisya, a mahala gīnu. Umwe mukukūmbukila i mboniboni une nālinayo pakaya patali mma, pamo u busanusyo ubunini, nābūkile mu buyo bula nu kukēta abāndu bala? [Ikilundilo kikuyoba, “Ameni.”—Nsimbi] Lilino, u mbepo gwako isa kugomokela ku mbili gula, kangi u—u luko lula ulwa mbili, u moyo, ugu go mbili ugu gutikufimbilisigwa ukulya na fyosa bo ifyo. “Linga ikitēmbē ikyamfu iki kisungulwīke, uswe tulinakyo kimo kitalile kikugūlīla,” u mbili gwammwanya. Kangi nu mbepo yula, kangi u moyo gula kangi umbili gwammwanya, ugwe kusumusyaga kangi umbili gwakipeligwa ugu ku Fyīnj’elifu unkulumba. Muketile? Ugwe uli na maka mwa ugwe lilino, ukubomba ikyo, lilino, lōli amaka gala aga ugwe uli nago mwa ugwe lilino gwābagile ukutēndēka ikisu ikipya. Kyala akaya nato utunini, ututōndobya utōnywa, kangi ifinywāmu, ifitōndōbya ifisito ifi fyo fyāmaka, a kanini—fiyo akanini akapalamāsye ka Kyala ko makagōsa, muketile, a kanini—fiyo, akanini akapalamasye ka Kyala.

⁸ Polelo, umwe mumenye, polelo une ngugela ukubatwala umwe mu lwitiko lilino, umwe mumenye ukuti ikindukimo kibonike kwa umwe, ukuya Nkristi. Ngimba umwe mumenye? [Ikilundilo kikuyoba, “Ameni.”—Nsimbi] Ugwe gwalisibile ukwitoga pási *apa* mu ndipa, ni ndipa syosa nu butulwanongwa, nukunwa, nukukoma injuga, kangi—kangi ifindu ifya nkisu. Ena, akabalilo kako ugwe kwitika ukuti Kristi answege imbibi syako, ugwe ufyusigwe pamwanya pa findu ifyo. Lilino ugwe gwe itogile pamwanya *apa*, muketile, pamwanya pa fyosa fya ikylene. Nongwa ya fiki? Panongwa yakuti ugwe kwitika ukuti ugwe gwe Nkristi. Polelo akabalilo kako ugwe gwalimmwitikisye Kristi, kangi u Mbepo Mwikemo alinkwisa kwa ugwe, polelo ugwe uli nu lwitiko mwa Mbepo Mwikemo, uyu ikupa ugwe amaka ukwītōga pamwanya pa luko lula lwa būmi bwa butulwanongwa.

⁹ Ena, lilino, ikindu kyene iki ugwe kufimbilisigwa ukubomba, ukwitoga fiyo mu bubumbulusyo, itolo yaga nu lwitiko lwingipo, itolo—itolo umilisyaga ukugutila ikyene panja. Muketile? Kangi pala ugwe ulipo. Lilino polelo ugwe uli mbine, kangi ugwe ukaya Nkristi, yaga Nkristi lululu lilino, ukuti amaka ga bubumbulusyo gala gisakwisaga mwa ugwe, ukwisila nukuya Nkristi. Kangi ikyo kisa kukupa ugwe u lwitiko ukwītōga pamwanya pa butulwanongwa. Ikyēne kisa kukupa ugwe u lwītiko. Kangi filifyosa ifi ugwe uli nu kufūmbwa, mu njila iyi, fili itolo mwa ugwe lilino. Kangi i kindu kyene iki ugwe kufimbilisigwa ukubomba kyo lwītiko mwa Kyala, ulu lukugutila i findu ifinunu fila ukufuma kwa ugwe, iki kili mwa umwe, ukwisila mwa Mbepo Mwikemo. Ngimba umwe mukupilikisya pabwelu lilino? Umwe mukupilikisye ikyēne?

¹⁰ Une ngusūbila Billy ambulile une, ikilo kya mmayolo, alīngōlile une nukuti, “Isaga muno, ulubunju ulu, fiyofiyo ku mundu yumoywene ikwisa, ikwinogona uswe tukuya ni ngomano undungu ugu, isya Fūngilo Ihano-na-ibili sila.” Kangi abēne bātwele u mwāna u mbine, une ngwitika. Kangi linga ugwe uli apa lilino, nkulumba, kumbukilāga, ugwe ukabagila... Ulwitiko lwako—lwako lukufimbilisigwa ukubuka ku mwanike yula, linga akene ko—linga akene ko kāna akanini, mwanike.

¹¹ Loli lilino unko une nege i Lisimbo ilingi, linga ikyene kili kanunu, itolo pa kabalilo. [Nkundwe Neville ikuyoba, “Kindililāga itolo nkyeni, Nkundwe. Amenī.”—Nsimbi]

¹² Kumbukilaga itolo, lilino, mu Nongwainunu sila, uswe tukubala mu ntu gwa 16, une ngwitika, ugwa Imbombo, kūko fikuti Pauli na Sīla bāli nnyūmba ya minyololo ikilo kimo. Kangi abēne bāfumile pa kukōmīgwa panongwa yakuti abēne bāsōsisye u mbepo gwa mōhēsi pānja pa ndīndwāna u njoba-isyabulagusi. Kangi ikyēne kyāli... Kangi, umwēne, abafūndi bāke bāfikile pa kukalala isya ikyēne. Nu kubakoma abēne, ukubabāka abēne mu nyūmba ya minyololo ya nkati. Kangi polelo akabalilo kāko abēne bābōmbile ikyo, bo Pauli na Sīla bīpūtāga, kangi Kyala ātumile a kasenyēnda nu kuyūgānia i nyūmba ya minyololo lōsa.

¹³ U ndindililaminjololo gwa kiFilipi, ukuya nsikali gwa bamia, iki, uku yōngēsya a bāke—bāke abāmminjololo, kwābagile ukuya u būmi bwāke bwēne āngāle bwābagile ukuhōmba kuli u gwāmminjololo yula. Umwene alinkukwaba u lūbo lwake kangi ayaga pa kusulwa ukwīgōga-mwene, akabalilo kāko Pauli ābopāga pānja nukuyoba, “Komma ukwībōmbēla gwīmwenē u bufulasye. Uswe twēsa tuli apa.”

¹⁴ Kangi unsikali gwa bamia uyu ālinasyo, tutigi, inyīnogōno abēne bāfumile ukuya nasyo isya Pauli na bala. Abēne lumo bālimbile i nyīmbo. Abene lumo babagile ukuti babikil’ubuketi, pamo bābombile ikindukimo. Loli, kilikyosa ikyene kyāli, abene

bāmenye ukuti abene bāli banyambala abikemo. Abene bamenye kyalipo kimo ikikindane ukufwana na banyambala bala. Panongwa yakuti, mbibimbibi, umwēne ālālusisye, “Ngimba une mbagile ukuti mbōmbe fiki ukuti mbokigwe? Ngimba une mbagile ukuti mbōmbe fiki ukuti mbokigwe?”

¹⁵ Lilino, Pauli āyobīle, “Itika pa Ntwa Yeso Kristi, kangi ugwe ni nyumba yako mwisakupokigwaga.”

¹⁶ Ena, lilino, linga kwitika pa Ntwa Yeso Kristi. . . Ikyo kitikusanusya ukuti ubupoki *bwake* bukupoka inyumba. Loli linga umwene ali nu lwitiko ulwakufwana mwa Kyala ku bupoki bwake bwene, umwene abagile ukuya nu lwitiko lulalula ku nyumba yake. Kangi inyumba yake yisakufimbilisigwa ukwisamo, muketile, ikindu kilakila.

¹⁷ Mulalula mumo Yobu ābombīle, mumo une nāyobile ikilo ikingi, kula ku Georgia, ku lukomano. Une ndinkuti, “Yobu, umwene alinkuti, ‘Lilino, une ngamanya a bāna bāngu batulilw’inongwa, lōli bule linga abēne batulilw’inongwa?’” Kangi Yobu ali ni kindu kimokyene ukubomba, ukuya ngolofu, uyu aali, ukupa icyabupi icyakokya. Umwēne āyobile umwēne āpāga icyābupi kyākōkya, linga abāna bāke bātulilw’inongwa, polelo abēne bāhobokeligwāga isya butulwanongwa bwābo. Kangi icyēne kyāli kīndu kinunu ukuti tāta abōmbāga icyēne. Uyo yo tāta umwīnogōna-innunu. Uswe tukufūmbwa bīngipo ba luko lula lwa bātāta umwīsyūgu. Kangi Yobu āpāga icyābupi kyākyōkya. Apo po bukāli ubutolwe bwāke ukwisamo.

¹⁸ Loli akabalilo kako abana bake bosa bagogigwe, kangi ing’osi syake syosa syālyōnangigwe, kangi fyosa ifi umwene ali nafyo, umwēne itūgasyāga pa kūlu ka līto ku mbenu kwa nyūmba yāke, ikwīngw’āla mwēne na kapatu ka ndeko.

¹⁹ Ngimba umwe mwākētesisye, ukufuma pa masiku ga butolwe bwāke, akabalilo kāko Kyala alinkwānda ukupyānikisya ku mwēne kāngi? Kūko umwēne ālinasyo ing’ōmbe maelifu kalongo, na fyōsa bo ifyo, Umwēne āpyānikisye kabili-kōsa. Kangi kabili-kōsa isya ng’ōsi, kangi ābilibisye filifyōsa. Lōli ngimba umwe mwākētesisye? Kangi Kyala yōpe āpele Yobu abāna bāke bahano-na-babili. Ngimba ugwe gwīnogwīnēmo siku kūko uswe tuliko? Ikyābupi icyōke kila kīmīlilāga abēne. Abēne bāpokigwe, mu Lwīmīko, ukugūlīla kuli umwēne ukwisa. Umwēne ali na bēne umwīsyūgu. “Ugwe ni nyumba yako mwisakuponesigwaga.” Muketile? Lilino, Yobu ali ni kindu kimokyene ukubomba, ukuya ngolofu, alinkupa icyabupi icyakokya.

²⁰ Ugwe uli ni kindu kimokyene icyakubomba, ukuya ngolofu, uko ko, ukuyanalo lwitiko mwa Kyala. Kabuno, nu lwitiko ugwe upokigwe, nu lwitiko ugwe ubumbulusigwe, nu lwitiko ugwe kuyanakyō kilikyosa iki ugwe uli nakyō. Muketile? Ikyene kyo nu

lwitiko, ukuti umwe mukwitika ikyene. Lilino, “Itika pa Ntwa Yeso Kristi, kangu ni nyumba yako mwisakuponesigwaga.”

²¹ Lilino, nkulumba, linga ugwe uli nu mwāna apa ukwīputiligwa, ugwe itika, gwīmwe. Une ndi apa ukubika ulwitiko lwangu nu lwako, kangu uswe tukwitikaga, palikimo, ukuti Kyala isakubumbulusyaga umwanike yula.

²² Umwe muketile, uswe tulinafyo mwa uswe a maka ukubōmba ikyo. Ugwe uli na maka mwa ugwe ukubomba ikyene. U Nkristi aligwesa ali nago a maka ukubomba ikyene. Lōli lilino linga uswe tubagīle itolo ukwēga...A maka gala gikulagililigwa nu lulagīlo.

²³ Bo mūmo une kīngi njobile, ikyēne kili no ubusito bukulagila a mīsi, panongwa yakuti ulwēne lo lulagīlo. Ubusito bukulagila a mīsi.

²⁴ Iisuba, likulagililigwa ni—ni i...pamo i kīsu, ukusanuka kwa kīsu. Ugwe ukabagīla itolo ukupela ilisuba ukubomba ikindu kimokyene, polelo nukuyoba, “Une ngwitika une ngulonda ukugona utulo akabalilo katalipo. Kolelela i sala yimoyene.” Ilyēne litisakubōmba ikyēne, muketile, nongwa yakuti lulipo ululagīlo. Linga ugwe kubombaga ukufwana nu lulagīlo lula, ena, polelo, kilikyosa kikuyaga kinunu mosa. Linga ugwe kubuka kukugon’utulo nkabalilo, ugwe ubagile ukusumuka akabalilo. Kangu linga ugwe... .

²⁵ Mūmo uswe tulinagwe Sūmbi Superior, Sūmbi Ontario, Sūmbi Huron, na bosa bala a Bāsūmbi Abakulumba pamwanya apa. Uswe tulinago abakalongo ba maelifu ukōlogāna maelifu ga ma ekala ga kīsu pānja mu Nevada, kangu California, kangu Arizona, kangu New Mexico, aga gikupya, kuli a mīsi gala, ukufuma ku kīsu iki kyābagile ukukusya kalikōsa. Ugwe gwābagīle ukuswīla ikīsu kyōsa, panja pala, linga ugwe itolo gwāli na mīsi aga, pamwanya apa, pāsi pala. Kangu ikyēne āngāli kitikutamyā kila, panongwa yakuti ikyēne kikuswīligwa ni nyībuko. Itolo mbimbibi bo ikyēne kikūsōka pānja, itolo kikwīsa pamwanya itolo kīswīle kāngi, ’nongwa yakuti ubusito bukukolelēla agēne pamwanya pala. Ena, lilino, linga ugwe ubagile ukubomba ukufwana nu lulagīlo lwa busito, ugwe ubagile ukwēga bōsa a Bāsūmbi Abakulumba nu kōnelēla i kīsu kyōsa pānja pala, nukulyesya ikisu kyosa, nayumo isakuyaga ni njala. Loli ugwe ukabagila ukwitugasya apa nukuyoba, “Ena. Une nguketa ikyene. Nalolili.” Ugwe kufimbilisigwa ukubūka ukubomba ikyene.

²⁶ Ena, iyo yo njila yilayila ikyene kili nu lulagīlo lwa Kyala. Ululagīlo lwa Kyala lo lwitiko. Kangu uswe tuli nu lwitiko apa, ulubunju ulu, ukubumbulusya ububine bulibosa, ukubomba kalikosa. Loli ulwene lukulagililigwa nu lulagīlo, kangu ululagīlo lula lo lwitiko. Ululagīlo lwa Kyala lo lwitiko. Yeso āyobīle, “Kilikyōsa iki ugwe kunyonywa, akabalilo kāko ugwe kwīpūta,

linga ugwe ubagile ukwitika ugwe kwambilila icyene, ugwe ubagile ukuya nakyo icyene.” Mwaketa umwe lelo. Popapo, ulwene lo lwitiko lukulagila icyene, kangi u lwitiko lupegigwe kwa uswe itolo bo mumo uswe tuli nu kufumbwa kwa ulwene. Lilino, uswe tukufimbilisigwa uku... Kyala bingi ba uswe ulwitiko lumu, bamo u lwitiko ulungi. Icyene kikaya gamo amaka amakindakipeligwa aga ugwe ulinago. Panongwa yakuti, akabalilo kako ugwe kuya Nkristi, ugwe—ugwe utalile uli na maka, loli ugwe kufumbwa u lwitiko mu kubombela a maka gala.

²⁷ Polelo lilino, ulubunju ulu, akabalilo kako ugwe kwisa ukwiputiligwa, kumbukaga, i Bangeli lyayobile iki. Iki kyo kyabwanaloli. Yakobo 5:14, “Linga balipo balibosa nkati mmyinu, babine, unko abene bakolere abakulumba ba kipanga. Unko abene babapake abene na mafuta, nu kwiputira pamwanya pa bene. Ulwiputo lwa lwitiko lukupoka ababine, kangi Kyala isakufyusa umwene.” Ulwene lo lufingo, linga ugwe kwitika icyene. Polelo, muketile, ububumbulusyo buyabiligwe kwa gwesa pamwene.

²⁸ Icyene kyali mmasiku ga Yeso gwa Nazareti. Umwene akabagile ukubabumbulusya abandu ukulwana nu lwabo—ukulwana nu lwitiko lwabo bene. Umwene alinkuti, “Une mbagile, linga ugwe kwitika. Linga ugwe kwitika ukuti une mbagile ukubomba iki, une mbagile ukubomba icyene.” Linga ugwe ubagile ukwitika icyene!

²⁹ Popapo, abandu bamo bikutaga i—bikutaga a maka ga lubumbulusyo nkati mwa bamo abangi, abasasanianongwa. Icyene kikaya ikyo mma. A maka ga bubumbulusyo gali mwa ugwe. Icyene kili mwa ugwe. Abene itolo balinkubika iki gileta pankyeni pa falasi. Undumbilili akaya na maka ga kubumbulusya.

³⁰ Umwene yo Mbepo Mwikemo uyu ali na maka ukubumbulusya, kangi ugwe uli na Mbepo Mwikemo. Ugo go mpiki unnini ugu ugwe guli, kangi ifindu fyosa ifi ugwe uli nu kufumbigwa fili mwa ugwe. Popapo, polelo, ugwe itolo kwanda ukunwa ukufuma ku lufingo lwa Kyala, ikuyoba, “Ulwene bo bwanaloli. Kyala ayobile Umwene isakumbumbulusyaga une. ‘Ni fulale Syake une mbumbulwisye.’” Mwaketa lelo umwe. Umwe mumenye iki umwe mukubomba? Ugwe kwanda ukugutira panja ububumbulusyo, ikyo kyo kyosa. Muketile? Kangi polelo, abangi babagile ukuketa iki ugwe uli nakyo.

³¹ Lilino iki icyene kili, “U lwitiko lo kpalamasigwa kya findu ifisubiligwa, ubuketi bwa findu ifi fitikuketigwa.”

³² Une mbagile ukutwala ikipiki iki ikini kila panja. Une ndikubabona aba apulo, loli abene bali nkati mula. Akapiki akanini kala kamenye abene bali nkati mula. Polelo umwene itolo alinkwanda ukunwa, ikugutira kangi ikugutira, panongwa yakuti umwene amenye, “Icyene kili mwa une.

Une nisakukisōsyāga icyēne panja apa pakabalilo. Mbapo une akabalilo kanini. Itolo ngyūnga une akabalilo kanini.” Umwene itolo ikumilisyaga ukunwa. “Ena, une mmenye aba apulo bali mwa une. Une ngubatwala abene kuno, linga kakindilepo akabalilo.” Kangi ikindu kyakwanda umwe mumenye, apa abene bikwisa. Apa bikwisa aba apulo, panongwa yakuti umwene aalitike ukuti abene bali mwa umwene.

³³ Kangi linga ugwe kwitika ukuti a maka ga Mbepo Mwikemo gali mwa ugwe, ukukubumbulusya ugwe, gwākēta ugwe lelo. Itolo umilisyaga ukugutila. Muketile? Ugwe uli nu lwītiko. Ugwe ukabāgila ukukēta ifyakukōngesya palapala itolo. Ugwe utikukibona icyene.

³⁴ Lilino, muketile, Yākóbo ālimmwītikīsyē Abraham ukwisila mu mbombo yāke. Pauli ālimmwītikīsyē Abraham ukwisila mu lwītiko lwāke. Ngimba uswe tukuyobaga fiki lelo, pakati pa babili? Abraham aayobaga pa iki. . . Une ngusanusya, Pauli aayobaga pa iki Kyala aaketaga mwa Abraham. Kangi James āyobaga pa iki abandu bāketile mwa Abraham. Muketile? Lilino, muketile?

³⁵ Polelo, Kyala āmenye ikyo, bo u mwāna akāli ukwisa, ukuti Abraham āli nu lwītiko. Kangi Abraham āsisimikīsyē icyēne kwa Kyala, ukwīsilā mu kubōmbēla ngati (umwēne) u mwāna yula āyaga pakwīsa akabalilo kāko umwēne āli nsitamboto. Umwēne akāli na bāna nabamo. Mūnda mwa nkasi gwāke mwāfwīle, kangi umwēne āli nsitamboto. Loli, pōpe, umwene āmenye, “Nkati mula pabuyobumo ālīmo u mwāna.” Umwe muketile, umwēne alinkūmilīsyā ukunwa ulufīngo, ukwigēmekēsya pa Kyala unkulumba El-Shaddai, i *Libēle*. Ukwigēmekēsya pala, ikunwa, amenye ukuti Kyala ikupaga icyene ku mwene; āmenye ukuti ulwene lwāli lufīngo, kangi Umwene āfimbilisigwāga ukubomba icyene.

³⁶ Kangi uswe twe bana ba Abraham. Polelo unko uswe twigemekīsyē ku lufīngo Lwāke, nukukolelela kula, ukumanya ukuti Kyala isakubōmbāga icyene. Umwene āyobīle lūlo. Umwe mukwitika icyene lilino? [Ikilundilo kikuyoba, “Ameni.”—Nsimbi]

³⁷ Polelo unko u lukīndi lwa babine lwīse ukukilania apa pa lumo mwa mbafu pamo u lūngi, aba bikulōnda ukwīputilīlīgwa. Kangi linga uswe tukwāga unkulumba apa nu kubapaka abēne mu mafuta, Une ngubasumusyaga abene, kangi uswe tukwitikaga ukuti Kyala isakupelaga alīgweša gwa bene ukuya kanunu. “Linga ugwe ubagile ukwitika.”

³⁸ Teddy, ngimba ugwe uli kugu? Isaga ukusyungutila pa lubafu ulu ulwakililo. Ikyo kyo kinunu. Kangi une ngulonda ugwe ukukuba *Itika Itolo*.

39 Kangi bo abene bikwisa, unko uswe itolo twinamisye imitu gyitu, ikilundilo kyosa, kangi unko uswe tuyege ndwiputo panongwa ya bandu aba babo bikwisa.

40 Gwītu Tāta Gwakumwanya, uswe tukutwala kwa Ugwe, ulubunju ulu, mu Ngamu ya Yeso Kristi, abapelakisa aba, ababine, ubūndu ubukubilwe aba bo bali nkayīlo akabibi, ubwītūgāsya ubwabutulwe. Une ngwitika Ugwe, Ntwa. Une—une mmenye ukuti a Masyu Gako go gabwanaloli. Agēne go gābwanalóli! Agēne gakabagīla ukutolígwa, panongwa yakuti Agēne go lya Kyala Lāsypwa kangi i Lisyu lyābwilanabwila. Agene go gāmaka-lōsa, bo Kyala ayīlile, panongwa yakuti Agēne go kiyabo kya Umwene. “Ku bwandilo lyalipo i Lisyu, kangi i Lisyu lyāli na Kyala, kangi i Lisyu āli Kyala. Kangi i Lisyu lilinkuya mbili nukwitugasya pakati pitu.” Lilino, uswe tukwitika ikyo, Ntwa, ni ndumbula syitu syosa, nu moyo gwitu gosa, na fyosa ifi fili nkati mwa uswe. Uswe tukwitika ikylene.

41 Kangi une ngelīle, mu njila imbepe, injila ya ngati-mwana, ukukitwāla ikyēne ku bāndu, ukuti abēne babagile ukupilikisya nu kumanya ukuti a Maka ga Kyala galambalele nkati mu bēne. Linga abene babagile itolo ukuya nu lwitiko lwabo nu kukonga ubulagili bwa Kyala!

42 Umo mo mūmo abēne bapokígwe. Abēne bikwisa nukupīnduka ukufuma ku mbībi syābo, kangi bālyōsígwe mu Ngamu ya Yeso Kristi, ukufwana ni Bāngéli ili, Imbombo 2. Kangi polelo Peteri alinkuyoba, ukuti, “Ugwe kwambililaga ikyabupi kya Mbepo Mwikemo.” Kangi apa Ikyene kikwisa, itolo katikati, panongwa yakuti Ikyene kyo Lisyu lya Kyala lipeligwe ukuboneka.

43 Ena, lilino, ikindu kilakila, Tāta, uswe tumenye kyo kyabwanaloli, akabalilo kāko uswe tukupaka ababine na mafuta, nukwīpūtīla pamwanya. “Ulwiputo lwa lwitiko lukupoka ababine. Kyala isakubasumusyaga abene.” Kyala, gwesa alisōkaga ikigemo iki, ukusyungutīla ubuyo ubu ulubunju ulu, ahobwike fiyo kangi nukusangaluka, mu kumanya ukuti Kyala ababumbulwisye abene. “Bukaga, nu kuya kanunu.” Kabuno uswe tukubabika abene kwa Ugwe lilino, mu Ngamu ya Yeso Kristi.

44 Kangi aligwesa ali bumbulusigwaga, nukukola imboniboni, iki ikylene kikusanusya, ngati Abraham, ukukōlēla ifīndu fila ifi fikayako ukuya ngati ifyēne fyāliko, kisita kupāsya iki ifyakukōnga fili, ikyo kikaya nakyo nakimo ikyākubōmba nu lwītīko. Ifyakukōnga fyo nakimo. Ulwitiko lutalile lwēgile ubukolelelo. “Kangi u lwītīko lo kipalamāsīgwa kya findu ifisūbilígwa, kangi ubuketi bwa findu ifi fitikukētīgwa.” Kyala, ikylene kiliyubikigwaga mbusolofu mu ndumbula syabo, kabuno abene bikukufūmbwa Ugwe.

45 Une ngubuka ukuya gwambombo Gwako ugwakwilambika, ukwima apa na babombi abangi, kangi ngusuma Kyala ukubika mu ndumbula syĭtu kuli bāndu ababine aba. Uswe tukusuma ikyēne mu Ngamu ya Yeso. Ameni.

46 Yumo āyobīle Nkundwe Estle Beeler āli nkiyūmba. Kangi une ngusubila alipo undumbilili uyungi apa, uyu alongolile ndwiputo, ulubunju ulu. Uswe tukulonda ukubalālūsya abalūmbilili bōsa apa, kilikyōsa abēne bali, linga umwe mubagile ukwisa kuno nukwima ukusyungutila ikigemo iki na uswe, itolo pa kabalilo, panini, ngulamba, bakundwe. Kangi a banyāmbāla. . . Nkundwe Ben, ndaga ugwe. Isaga papapa pamwanya apa nukwima ukusyungutila apa, ukusyungutila ikigemo apa, ukuti uswe tuyege nu lwiputo na bandu aba, babika amaboko pa bene.

47 Lilino, bo abene bikukina ulwimbo. Kangi abalumbilili bikwega ubuyo bwabo apa, polelo uswe, aligwesa, abagile ukubika amaboko pa babine.

48 Unko uswe tukete, ukwīsa ukusuluka ukukilania i kyāmba kula. Une ngukēta u Nnyāmbāla, akāli mulimōsa gwākukindāna ukufuma ku nyāmbāla aligwēsa uyūngi. Umwene āli itolo Nnyambala ugwapaliposa, uluko lwa nnandi mu mbili, ndigi mōnywa. Mumo uswe tukunketa Umwene ikuketa, amaso Gake pa—pa buyo ukwisa pa kikoga. Ikyēne kyaali batumigwa Bake. Abene bāli nu ndumiana pāsī pala, uyu āli ni kisilisili, kangi kisita kwilamwa loli abene bāyobaga, “Mbumbulusya umwene, Ntwa! Mbumbulusya umwene!”

49 Loli, umwe muketile, itolo yoba, “Mbumbulusya umwene, Ntwa, mbumbulusya umwene,” kitisakubomba ikyene. Ikyo itolo kitisakubomba ikyene. Pikufimbilisigwa ukuyapo ikindukimo kunyuma kwa ikyo, “Mbumbulusya umwene, Ntwa, mbumbulusya umwene.” Muketile? Kangi linga une mbagile ukukusubila ikyo, nu kwitika ikyi ni ndumbula yako yosa, ugwe kubumbulusigwaga, linga une ngubafika umwe ukukēta i mboniboni.

50 Lilino kēta, abafūndigwa bala bīmīle pala, lumo bikunjūgānia umwēne, lumo ukugūta nubukafupo, “Itikaga ikyene, Nkundwe! Itikaga ikyene! Aleluya! Itikaga ikyene! Mbumbulusya umwene, Ntwa! Mbumbulusya umwene!” Lōli u mōhēsī ālitūgēsye palapala pala, panongwa yakuti umwe alinkutoligwa ukwāga u lwītiko lwākufwāna pala ukumpela umwēne ukusōkàpo.

51 Loli apa ikwisa Yumo pāsī ukukilania akāmba. Kangi akabalilo kako u mōhesi yula asyagenie ukuti Yula āli gwakukindana panini ku bandu abangi! Muketile?

52 Lilino, ulo lo luko lwa bandu uswe tukulonda ukufikako mula, bo yu Ntwa Yeso gwitū. Ena. Itolo komma ukwisila kuli

ikibonesyo, loli isaga, ngána Kyala gwitu, manya ukuti uswe tutumigwe ukubuka ukubomba iki. Ubu bo bulagili bwitu.

⁵³ Polelo, akabalilo káko Umwēne ālyēndile pamwanya kwa gwīse, une ngwīnogōna iki ko kūko u lwīmbo ulu lwāsīmbigweko, lwālyātīgwe ukufuma ku Lisyu, umwene alinkuti, “Ntwa, yaga ni kisa pa mwanundumiana gwangu, panongwa yakuti umwene asyutulisígwe mulimōsa fiyo nu mōhēsi.” Alinkuti, “Tkyēne kikunsopa umwēne mu moto, kangī kikunsyūtīsiya lōsa na fyōsa bo ifyo.” Umwene alinkuti, “Une nālīntwele umwene ku bafundigwa Bako, loli abene balinkusita kumbululsiya umwene. Loli une—une—une ndīnkwinogona . . .”

⁵⁴ Umwene alinkuti, “Une mbagile, linga ugwe kwisa kwitika. Lilino, une ndinago a Maka nkati mwa Une,” Umwene alinkuyoba, “ukubomba ikyene, linga ugwe ubagile ukwitika kila.”

⁵⁵ Ābagile Kyala ukuleka bala abāngu abambuligwa-nakansa aba bītūgēsye apa ulubūnju ulu, aba bo bāmbuligwe, bagonekīgwe-pa-kitala na kānsa, kangī kansa gwa lilopa, ububine, ubōnywa, ābagile Kyala ukubabūmbululsiya abēne nu kukilania ugwe ukukīsānia? Komma lumo. Umma. Muketile? Lilino, Umwene atikutoligwa. “Une mbagile, linga ugwe kwitika.” Ngimba Umwene āyobīle fiki?

Kabuno fyosa ifindu fibagile, itolo . . .

Lilino, Nkundwe Tyler, isaga pamwanya . . .? . . .

Lilino itika itolo, itika itolo,

⁵⁶ Lilino, bo une ngwiputa, une ngulonda umwe ukubika amaboko pa bandu. Kilikyosa iki abene bikulondigwa, . . .? . . . kangī bukaga ukusuluka itolo ulukindi.

⁵⁷ Nkundwe Neville, ugwe konelela na mafuta, kangī bakundwe . . .? . . .

⁵⁸ Ngulonda aligwesa, mu kilundilo, nu ntu gwāko gwīnamisígwe lilino. Aligwēsa nubusolofu mu lwīpūto.

Itolo . . .

⁵⁹ Ntwa, yaga ni kisa, une ngwiputa, kangī babumbululsiya abandū aba, ukwisila mu Ngamu ya Yeso Kristi. Ameni.

Mu Ngamu ya Yeso gwa Nazareti . . .? . . .[Ubuyo busitakandu pa tepi—Nsimbi]

⁶⁰ Bingi fiyo, mu lukindi, bikuketesya abene, ukuketa ukwamula kwabo mumo abene bāli, ukukēta mumo abene bikubōmbela pa kabombelo. Muketile? Kilipo ikindu kimo bo kabombelo, abene bāsumwike nu kwisa ku nkyeni. Ikindu ikingī, ko mumo abene bābōmbelāga pa kabombelo káko abene bapelile. Ukufuma pāpo abēne bīsīle ku buyo ukwītīka, ukuti,

akabalilo kâko abêne bĭputilĭgwe, abêne bikubũmbulusĭgwa, polelo ketesya akagomokesyo ka kabombo kabo.

⁶¹ Lilino, untimi gwitu ali ni ndumi inunu kuli uswe, une nsisimikisye, ulubunju ulu.

⁶² Ikindu kimokyene une ngulonda ukuyoba pa kabalilo kanandi itolo, āli ndindwana gwa Kikatolika imile pala pa kigemo. Amasiku manandi aga gakindilepo umwene aali mu nyumba yangu, umwene nu ndume gwake. Kangi une nummenye undume gwake pa kabalilo kamo. Kangi—kangi kyālipo ikindukimo ukusyũngutila bo uswe twālītũgēsye mu bwāngāla bwākūsófu.

⁶³ Uko ko kũko uswe twāli ni mboniboni. Apo po pāpo uswe. . . Une nālisibile ukuya nakyo iyene apa mu kipanga, loli itolo yegile ulubunju, na fyosa bo ifyo. Kangi polelo iyene yāli nkati mula.

⁶⁴ Une ngayobilémo siku nakimo, panongwa yakuti umwene ukuya ndindwana, ikindu ikingi, akabalilo kosa akũsiigwe mu kipanga kya Katolika, na fyosa bo ifyo. Loli umwene alinkubuka ukuyobela mama gwake. Kangi nkabalilo kala, une ndinkuyibona imboniboni ya māma gwake. Yālimbũlile umwēne iki ulutamio lwa māma gwāke lwāli, nu kundĩngānia umwēne, na mũmo u māma gwāke ābonekelāga. Ena, umwene ndòngi gwa ikyo, kali ikyene kyāli kitalusye pamo mma. Une ngambonamo siku unna, mbumi bwangu. Umwene amenye ikyo.

⁶⁵ Kangi u ndindwana, ulubunju ulu, ālisĭle ku kigemo apa nukwĭma, ukutēndéka ukulāta, nukwitikisya Kristi ukuya Mpoki gwāke. Umwene ābombile kila pa kigemo, ulubunju ulu.

⁶⁶ Nkundwe Neville, kisita kumanya, ālinkumōnelēla umwēne mu mafuta. Mũmo—mũmo Kyala ikubōmbēla! Ālimpakile umwe mu mafuta, afwānēge mbine. Lōli kētēsya ukwēnda kwa Mbepo Mwikemo. Lilino, ukuya ukuti umwēne āpakĭgwe, naloliloli akaya mbine, lōli mpakĭgwe. Kēta mũmo ikyēne kikupela kilikyōsa ukubōmba mbutalusye? Umwene ālīmĭle ukuya Nkristi lilino, ukufuma pāpo umwene ālisĭle ukuya iki uswe tukwitika ukuya Nkristi. Lilino, umwene alinkuti, “Ngimba ugwe ubagile ukummwiputula u māma gwangu? Umwene mbine.” Uyo yo yuyo. Polelo amafuta gākupaka gāpakĭgwe nukwandana.

⁶⁷ Une nĩnagonāga, mũmo kyākufwāna, ukuti, muketile, umunduyumi ukuya itolo mpokĭgwe. Kristi ālīmĭle kuli twēsa ba uswe. Umwene ikwima panongwa ya fyosa. Kangi mbimbibi itolo bo undindwana uyu ikwisa ukuya Nkristi, polelo umwene ikulonda ukwima kuli munduyumo, yope, ukubonesya ukuti u Mbepo gwa Kristi ikwisa nkati mwa uswe akabalilo kako uswe naloliloli tupokĭgwe. Lilino, ikyo kyo naloliloli kinunu. Une—une ngupalĭsya naloliloli ikyo, ukuti u mbepo gwa Kikristi gwa kwitika. Lilino, kumbukilaga itolo.

68 Lilino, ku nkikulu untubwa uyu, umwene ali apa pabuyo bumo, kangu ku nkikulu gwa Kikatolika uyu alisilepo. Kangu une ngulonda ukuyoba amasyu aga, itolo bo ngali une ngasanusya u lukomano kwa ntimi gwitu, muketile, kyo iki:

69 Lilino, i kipanga kya Katolika kyali kabalilo kamokene bo kipanga iki. Linga umwe mukugomokelaga kunyuma nukubala i Bangeli, ifi uswe tukwitika, kangu umwe mumenye ukuti ikipanga kya Katolika kyaali Kipanga kyakwanda. Isyo syo bwanaloli. Loli isyene silinkusoka ukufuma ku Fimanyisyo Fyake. *Iki* kyo kimanyisyo kya kipanga kya Katolika. Loli, umwe muketile, abene balinabo bamia tandatu ni kindukimo aba buku abanga aba abapapa na fyosya bo ifyo basimbile, abo bo itolo bikemo ku bene bo i Bangeli ili.

70 Popapo, muketile, iki kyo, ugwe ukasanukamo mma. Iki ugwe ubobile, ugwe upindwike itolo. Muketile? Lilino linga ugwe kwega. . . Ena, une ngusakikisya lumo bamo mwa umwe, babili, ulubunju ulu, bali bakikulu. Pabagile ukuyapo bamo abanyambala ba kiKatolika bitugese apa.

71 Linga ugwe kugomokelaga ku syambukulu sya kipanga, linga ugwe ubagile ukusuma umputi gwako, “Imbombo sya batumigwa aba mwi Bangeli apa, yali fikuti i njila iyi. . . Ngimba bala bali bo Bakatolika bakwanda?” Umwene isakuyoba, “Ena.” Kangu ikyo kyo kyabwanaloli. Abene bali. Lilino, abene, keta lo luko luki ulwa bwiputiputi abene bali nabo. Abene balyagene mu bunini, ubuyo ubupepe. Abene nasiku bakayobilemo, aba “Luponio Maria” pamo aba “Tata gwitu.” Ulo lo lwiho lwa kipanga. Ngimba abene bayobaga fiki? Abene balinkuntufya Kyala. Abene balinkulata. Abene balinkulila.

72 Keta apa mu Imbombo 2, akabalilo kako u mwikemo Ntumigwa Peteri, na Yakobo, na Yohani, kangu bosa bali palikimo. I Bangeli lyayobile abene bayobile mu ndimi. Kangu abene balinkulata, kangu balinkubombela fiyo—fiyo bisusigwe nu Mbepo mpaka abene bikubombela ngati abene bali bagale, kangu kyope mpaka ikisu panja kyalalusise, “Ngimba bosa aba bakagala?”

73 Kangu polelo Peteri, u ntumigwa, u mwikemo Peteri Mwikemo, akabalilo kako umwene alimile pamwanya, kangu umwene alinkuti, “Banyambala na bakundwe, abanyambala aba bakaya bagale mma, loli abene bisusigwe na Mbepo,” mumo i—bo i Bangeli lyayobile ukuti abene bali. Lilino, ikyo kyaali kipanga kya Katolika kyababwandilo, ukufwana nu bumanyisi bwabo.


74 Lilino, umwe muketile, bo fikindilepo ifyinja bamia babili, abayindikigwa balinkwanda ukwisamo nkipanga. Polelo ngimba abene babobile fiki? Abene batendike ikibugutila kyabo ku Lukomano lwa Nicene, A.D. 606. Abene batendike kyabo. . . Akabalilo kako u Lukomano lwa Nicene lwakoleligwe

ku Nicaea, Roma, abēne bikwānda ukwēga bōsa abagīndikīgwa abakulumba nkati, kangī abēne itolo *bābūmbūle* i kipanga, nu *kutēndēka* i kipanga.

⁷⁵ Ukufuma apo, ikyene kyabongotwike kana pamo kahano kosa. Abēne *bābūkīle*—abēne *bābūkāga* ukufuma ku kila, kwa bishopu; ukufuma kwa bishopu, ukubuka ku pāpa. Kangi ukufuma kila, pala palinkwisa i Greek Orthodox ni fikīndāne fimo, mpaka abēne itolo *bābongotwike*, kūko umwe mukukēta ikyēne umwīsyūgu. Ikyēne kyo itolo mu luko lōsa ulwa kubongotoka.

⁷⁶ Loli iki uswe tukugela ukubomba, mwinangu gwa Kikatolika. . . Muketile, uswe twe baKatolika, nūswe, uswe twe untasi, ugwakubwandilo Katolika. Kangi i kipanga iki abēne bikutukōlēla uswe lilino, kifuki fiyo, uswe tukukumbusya mumo ukuya baPentekosti, panongwa yakuti uswe tukwitika mu lusayo lwa baPentekosti.

⁷⁷ Kula ko kūko i kipanga kya Katolika kyapanganisīgwe. Kangi mu fipānganio fyītu ifya Pentekosti, umwīsyūgu, linga—linga ikīsu iki kibagīle ukwīma ifyīnja bamia bahano ukongelelāpo, ikipāngānio iki i kyaPentekosti, kyābagīle ukuya kyānyīhōpo ukukīnda u Roma Katolika āyīlile umwīsyūgu. Ikyēne kyo itolo kikusōkā ngapopo, injila yilayila. Kangi akabalilo kāko abēne bikupāngānia, abēne bikutēndēka kubugonelo ukufuma ku kyēne. Kangi poleli abēne itolo bikuya bugono, kangī abakipanga, kangī imyoyo imisitakupīndūka.

⁷⁸ Ku bakundwe bāngu abapala, bakundwe na bakalumbu, kwa umwe mwesa. Ukuya gwambombo gwa Kyala, une ngayobamo siku iki pabutasi, nkisu, mu kipanga iki, une ngayobamo siku. Loli ukuya nsololi gwa Ntwa, une ngayoba kwa ugwe, “Ulu lo Lumuli. Enda umwe mu Lwēne.” 

61-0813 Lwĩtiko
Kitembe Kya Branham
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org